

Na osnovu člana 36. st. (1) i (2) Zakona o plaćama i naknadama u organima vlasti Kantona Sarajevo ("Službene novine Kantona Sarajevo", broj 5/19) i člana 26. i 28. stav (2) Zakona o Vladi Kantona Sarajevo ("Službene novine Kantona Sarajevo", broj 36/14 - Novi prečišćeni tekst i 37/14 - Ispravka) Vlada Kantona Sarajevo, na 13. sjednici održanoj **30.04.2020.** godine, donijela je sljedeću

ODLUKU

O NAČINU OBRAZOVANJA I UTVRĐIVANJA VISINE NAKNADE ZA RAD RADNIH TIJELA KOJE OBRAZUJE VLADA KANTONA SARAJEVO I RUKOVODIOCI KANTONALNIH ORGANA DRŽAVNE SLUŽBE

Član 1.

(Predmet)

- (1) Ovom Odlukom utvrđuje se način obrazovanja stručnih komisija, savjeta i drugih radnih tijela (u daljem tekstu: Komisija), uslovi i kriteriji za obrazovanje Komisije, način ostvarivanja i visina novčane naknade za članove Komisije.
- (2) Pod Komisijom iz stava (1) ovog člana podrazumijeva se:
 - a) Komisija koju obrazuje Vlada Kantona Sarajevo (u daljem tekstu: Vlada) na osnovu posebnih propisa, čiji članovi mogu biti članovi Vlade i državni službenici;
 - b) Komisija koju obrazuje Vlada na osnovu posebnih propisa, na prijedlog resornih ministara, a čiji članovi su predstavnici jednog ili više organa državne službe;
 - c) Komisija koju samostalno obrazuje rukovodilac kantonalnog organa državne službe (u daljem tekstu: rukovodilac), a na osnovu posebnih propisa, uz saglasnost Vlade, a čiji članovi su predstavnici jednog ili više organa državne službe.
- (3) Članovi Komisije iz stava (2) ovog člana mogu biti i stručnjaci koji nisu u radnom odnosu u kantonalnim organima državne službe, a predloženi su zbog svoje stručnosti kao vanjski saradnici.
- (4) Članovi Komisije iz stava (2) ovog člana, mogu biti angažovani najviše u dvije (2) komisije istovremeno.

Član 2.

(Obrazovanje Komisije)

- (1) Komisija se može obrazovati radi:
 - a) predlaganja kadrovskih imenovanja, odnosno postavljenja po osnovu zakonske obaveze javnog oglašavanja;
 - b) provođenja redovnog godišnjeg popisa stalnih sredstava;
 - c) provođenja postupka javnih nabavki i
 - d) u drugim slučajevima propisanim zakonom.
- (2) Komisija se može obrazovati samo za poslove i radne zadatke koji nisu u djelokrugu nijednog zaposlenog u kantonalnom organu državne službe kao i za poslove i radne zadatke za koje je posebnim zakonskim i podzakonskim aktima utvrđeno da ih obavlja Komisija.

Član 3.

(Obrazovanje Komisije unutar kantonalnog organa državne službe)

- (1) Izuzetno od člana 2. ove Odluke, Komisija se može obrazovati i za poslove i radne zadatke koji su u djelokrugu kantonalnog organa državne službe, kad se radi o izuzetno

služenom zadatku koji ne mogu obaviti samo zaposleni u tom kantonalnom organu, bez saradnje drugih organa državne službe, drugih nivoa vlasti ili stručnjaka iz odgovarajuće oblasti.

- (2) U slučaju iz stava (1) ovog člana Komisija radi u radnom vremenu i nema pravo na naknadu za svoj rad, izuzev članova Komisije koji nisu zaposleni u tom kantonalnom organu.

Član 4.

(Sadržaj akta o obrazovanju Komisije)

- (1) Aktom o obrazovanju Komisije mogu se odrediti tehnička lica koja će obavljati administrativno-tehničke poslove za potrebe Komisije.
- (2) Akt o obrazovanju Komisije obavezno sadrži sljedeće podatke: ime i prezime predsjednika i članova Komisije, naziv organa državne službe u kojem je član Komisije zaposlen, ime i prezime tehničkih lica za obavljanje administrativno-tehničkih poslova za potrebe Komisije, poslove i zadatke Komisije, rok za izvršavanje poslova i zadataka i pravo na naknadu članova i stručnih i tehničkih lica Komisije.
- (3) Rok za obavljanje poslova i zadataka Komisije ne može biti duži od 90 dana, osim komisija Vlade, obrazovanih u skladu sa članom 43. stav (1) Poslovnika Vlade Kantona Sarajevo ("Službene novine Kantona Sarajevo", broj 4/16 i 36/16).
- (4) Smatra se da su poslovi i zadaci Komisije izvršeni nakon prihvatanja izvještaja od strane Vlade ili rukovodioca koji je obrazovao Komisiju, nakon čega organ koji je obrazovao Komisiju donosi rješenje o utvrđivanju visine i isplati naknade za rad u Komisiji.

Član 5.

(Kriteriji za utvrđivanje visine naknade)

- (1) Kriteriji za utvrđivanje visine naknade članovima Komisije su:
 - a) složenost oblasti za koju se obrazuje Komisija,
 - b) potrebna stručnost,
 - c) broj završenih predmeta,
 - d) potreba praktičnog rada na terenu,
 - e) obuhvat različitih oblasti,
 - f) obim poslova i zadataka,
 - g) precizno određeni rokovi za izvršenje poslova i zadataka, i
 - h) broj održanih sjednica stalne komisije Vlade, obrazovane u skladu sa Poslovníkom Vlade, uz uslov da se održi najmanje jedna sjednica mjesečno.
- (2) Članovi Komisije ostvaruju naknadu samo pod uslovom da su poslove i radne zadatke za koje su zaduženi aktom o osnivanju Komisije obavljali poslije redovnog radnog vremena.

Član 6.

(Visina naknade)

- (1) Članovi Komisije koja se formira na osnovu rješenja Vlade, odnosno rukovodioca, kada poslove kao član komisije obavlja izvan radnog vremena, imaju pravo na maksimalnu mjesečnu naknadu za rad u komisijama do visine jedne i pol (1,5) osnovice iz člana 5. Zakona o plaćama i naknadama u organima vlasti Kantona Sarajevo ("Službene novine Kantona Sarajevo", broj 5/19).
- (2) Tačan iznos odnosno visinu naknade za rad u Komisiji, svojim aktom utvrđuje Vlada, odnosno rukovodilac, za svaku pojedinačnu komisiju.
- (3) Naknada se isplaćuje po izvršenom zadatku i isključuje pravo na prekovremeni rad.

- (4) Naknade za rad u komisijama iz stava (1) ovog člana, a koje se finansiraju od uplata fizičkih ili pravnih lica, ne ulaze u ograničenje iz stava (1) ovog člana.
- (5) Tehničkom licu iz člana 4. stav (2) ove Odluke pripada mjesečna naknada najviše do 70% iznosa naknade koja se utvrdi u rješenju za jednog člana Komisije.
- (6) Izuzetno, Vlada zadržava pravo da u slučaju proglašenja stanja nesreće naknade isplaćuje u minimalnom iznosu propisanom posebnim zakonom, odnosno privremeno obustavi isplatu iste.

Član 7.

(Dostava izvještaja)

Sekretar Vlade i rukovodilac dužni su Ministarstvu finansija dostavljati tromjesečne izvještaje o visini isplaćenih naknada za članove Komisije.

Član 8.

(Izuzeci)

Ova Odluka ne primjenjuje se na komisije čije je obrazovanje regulisano posebnim zakonima i drugim propisima, a finansiraju se iz sredstava koja uplaćuju korisnici usluga komisije.

Član 9.

(Prestanak važenja ranijih akata)

Stupanjem na snagu ove Odluke prestaje da važi: Odluka o načinu obrazovanja i utvrđivanja visine naknade za rad radnih tijela koje obrazuje Vlada Kantona Sarajevo i rukovodioci kantonalnih organa državne službe ("Službene novine Kantona Sarajevo", broj 21/09 - Prečišćeni tekst, 19/12, 26/14 i 44/16) i Zaključak Vlade Kantona Sarajevo, broj 02-05-27435-38/14 od 30.10.2014. godine.

Član 10.

(Stupanje na snagu)

Ova Odluka stupa na snagu narednog dana od dana objavljivanja u "Službenim novinama Kantona Sarajevo".

Broj 02-04-10994-4/20

30. aprila 2020. godine

Sarajevo

Premijer

Mario Nenadić, s. r.